

DECLARATION  
du Roy, pour le resta-  
blissement du Droict  
annuel.



A P A R I S,  
Chez FED. MOREL, & P. METTAYER,  
Imprimeurs & Libraires ordinaires  
du Roy.  
M. D C X X I.  
*Avec Privilege de sa Majesté.*

THE NEWBERRY  
LIBRARY  
CHICAGO, ILL.

Case

F

39

326

THE NEWBERRY  
LIBRARY

1621 fs

48-1127



DECLARATION DV ROY  
POVR LE RESTABLISSE-  
*ment du Droict annuel.*

**L**OVIS PAR LA GRACE  
DE DIEV ROY DE  
FRANCE ET DE NA-  
VARRE, A tous ceux qui  
ces presentes lettres verront, Salut. Par  
nos lettres de Declaration du dernier  
iour de Iuillet mil six cens vingt, pu-  
bliées en nostre grande C'hancellerie, le  
sceau tenant, Nous aurions restably le  
Droict annuel pour neuf années pro-  
chaines, & consecutiues, commençant  
en la presente, aux charges & conditiós  
y contenuës ; Depuis laquelle publica-

tion les Officiers de nos Cours souueraines, & autres nos Officiers, tant de Iudicature, que de Fināce, nous auroiēt suppliē, ayant esgard à leur fidelité, & à l'affection avec laquelle ils nous ont tousiours seray, de vouloir moderer les cōditions portées par nosdites Lettres, Et particulieremēt les Officiers de nosdites Cours Souueraines, nous auroient faiēt Instance, qu'il nous pleust en consideration du premier rang qu'ils tiennent en la Iustice, de leur accorder le reſtabliſſement dudiēt Droit Annuel, aux meſmes charges qu'ils en ont iouy auparauant la reuocation d'iceluy. Et biē que la neceſſité de nos affaires nous peust diſſuader de chāger les condiōs de noſtre diēte Declaration, Eſtans contrains de faire fōds d'vne notable ſomme de deniers pour ſatisfaire aux grandes deſpenſes auſquelles nous ſommes obligez, pour affermir & maintenir la



tranquillité publique, à laquelle tous nos Officiers, plus que tous nos autres subiects, ont vn particulier & notable interest, Neantmoins ayant esgard à leurs supplications, & pour leur donner plus de subiet de continuer à nous seruir, N o u s, De l'aduis de nostre Cōseil, où estoient aucuns Princes de nostre sang, autres Princes, Ducs, Pairs, Officiers de nostre Couronne, & autres grands & notables personnages: Et apres y auoir faict voir l'Arrest de nostredit Conseil, & Lettres de Declaration du quinzième Ianuier mil six cēs dix huit, portans reuocation dudit Droict Annuel: Ensemble nos Lettres de Declaration du dernier iour de Iuliet dernier pour le retablissement d'iceluy: A v o n s par ces presentes signees de nostre main, surciz & surceons, & en tant que besoin est, ou seroit, reuocqué & reuoquons pour le temps de neuf an-

nées prochaines & consecutives, com-  
 mençans en la presente, l'execution des-  
 dits Arrests, & Lettres de Declaration  
 du quinzième lanuier mil six cens dix-  
 huit, sans qu'elles puissent auoir lieu,  
 & estre executées pendant ledit temps:  
 Et au lieu des conditions contenuës en  
 nosdites Lettres de Declaration du der-  
 nier Iuillet dernier, **V O U L O N S** & nous  
 plaist, que d'oresnauant à commécer du  
 iourd'huy, iusques à la fin desdites neuf  
 années, Tous nos officiers, lesquels au-  
 parauant l'année mil six cens dix-huit,  
 iouysoient du benefice dudit Droit  
 Annuel, suyuant les Arrests pour ce dô-  
 nez en nostre Conseil, Et ceulx de pa-  
 reille qualité qui ont esté establis de-  
 puis ladicte année, Reserué les premiers  
 Presidens, & Procureurs generaulx de  
 nos Cours de Parlemens, Seront des-  
 chargez & dispensez, ainsi, & comme ils  
 ont esté depuis l'année mil six cens qua-

tre, iusques en l'année mil six cens dix-huict, de la regle des Quarante iours, que chacun d'eux deuoit suruiure apres la resignation de son office admise, à compter du iour & datte du Contre-roolle de la quittance de finance de sa Resignation, Afin que pendant ledit temps, sondit office soit conserué à son Resignataire, venant à deceder auant lesdits Quarante iours expirez, ou bien à sa veufue, enfans, ou heritiers aduenant son decedz sans auoir resigné: A la charge (toutesfois) que ceux desdicts officiers qui voudront iouyr de ladicte dispense pendant lesdites Neuf années, seront tenus de payer par chacune d'icelles, sans discontinuation es mains des Tresoriers de nos parties Casuelles; Sçauoir, pour la presente année, depuis le iour de la publication des presentes, iusques au quinzième Aueil prochain, Et pour les huit années suyuant, depuis

le premier Decembre de chacune année, iusques au quinziésme Januier ensuyuant, Le soixantiésme denier de l'ancienne Eualuation faicte de leurs offices, ainsi qu'ils auoyent accoustumé auparauant la reuocation dudit Droit Annuel; Et outre de nous faire prest & aduance du quinziésme denier seulement, de ladite ancienne Eualuation de leurs offices, Dont ils feront, chacun, le payement és mains desdits Tresoriers de nosdites parties Casuelles, Sçauoir moictié dans le quinziésme Aueil prochain, & auparauant que d'estre receus à payer le Droit Annuel pour la présente année, Et l'autre moictié dans les mois de Iuillet, & Aoult ensuyuât, Fors & excepté les Presidens de nos Cours de Parlement, Maistres des Requestes ordinaires de nostre Hostel, Et les Conseillers, & Aduocats generaux de nosdites Cours de Parlemens: Les Presidens,  
Conseil.



Conseillers, Aduocats, & Procureurs generaux de nostre Grand Conseil : Les Presidens, Maistres, Correcteurs, & Auditeurs, Aduocats, & Procureurs generaux des Chambres de nos Comptes: Et les Presidens, Conseillers, Aduocats, & Procureurs generaux de nos Cours des Aydes, cy-deuant admis au payement dudit droict Annuel, Lesquels pour certaines considerations, nous voulons estre receuz à payer ledict Droict Annuel, tout ainsi qu'ils faisoient auparavant la reuocation d'iceluy, sans faire ledit prest & aduance, Dont nous les auons deschargez, & deschargeons par celsdites presentes. Et neantmoins n'estant raisonnable tirer le secours de nosdits officiers qui nous feront ledit prest, sans assurance de remboursement, ORDONNONS, Que venant à resigner leurs offices, les sommes qu'ils auront payées en prest ausdits deux payemens,

tiendront lieu , & seront precomptées  
 sur la finance de la Resignation , ou de-  
 mission de leursdits offices , au profit de  
 leurs Resignataires, Tant durant, qu'a-  
 pres lesdites Neuf années, en rapportant  
 la quittance desdits Tresoriers. Et où  
 apres icelles expirées , ils viendroyent à  
 deceder en perte de leurs offices , leurs  
 veufues, ou heritiers seront remboursez  
 dudit prest , par les premiers pourueuz  
 en leursdites charges , auparauant que  
 d'y estre receuz & installez : A quoy ils  
 seront contraincts , comme pour nos  
 deniers & affaires , en vertu desdictes  
 quittances, & presentes. **VOVLONS**  
 (aussi) & entendons que tous les offi-  
 ciers Royaux establis dans les Bureaux,  
 & Generalitez des Finâces, Sieges Pre-  
 sidiaux, Bailliages, Seneschauſſees, Ele-  
 ctions, Greniers à sel, & autres sieges &  
 Iurisdiccions Royales de ce Royaume,  
 dont la nomination, ou prouision a esté

accordée & delaissee par nos predecesseurs, & par nous, à quelques personnes, & pour quelque cause que ce soit, Jouyissent pareillement dudit Benefice, & dispense de la regle des Quarante iours, en payant à nostre proffit ausdicts deux payemens par forme de prest, la somme qui leur sera par nous ordonnée, dont la signification leur sera faicte dans trois sepmaines. **EXCEPTONS** toutesfois dudit prest & aduance les officiers, dont la nomination, ou prouision a esté par nous accordée à la Royne nostre tres-honorée Dame & Mere, comme aussi ceux qui ont acquis de nostre Domaine en vertu d'Edicts bien & deuement verifiez, avec pouuoir de nommer aux offices declarez par leurs contracts, & desquels Eualuation a esté faicte lors de la passation d'iceux : Duquel prest & aduance, nous voulôs que les Resignataires, ou ayans cause, soyent



remboursez par les mains des Tresoriers de nos parties casuelles, des deniers de leurs charges, lors que lesdicts officiers resigneront leurs offices, sans fraude, ou qu'ils viendront à deceder en perte d'iceux, & que les Resignataires, ou successeurs esdicts offices par leur decedz se presenteront pour obtenir lettres de prouision ou confirmation; en rapportant seulement ausdicts Tresoriers des parties Casuelles les quittances dudit prest, avec leurs quittances pour ledict remboursement. Ne pourra aucun desdicts officiers obliger audit prest, iouyr du benefice de ladicte Dispense, qu'en faisant les premier, & second payemens dudit prest, Et ceux dudit Droit annuel, au courant de chacune desdites Neuf années, fors & excepté l'officier, lequel viendrait à deceder entre lesdits deux payemens dudit prest, lequel iouyra de ladite Dispense,



apres le temps du premier payement  
 dudit prest & aduance expiré: Et se-  
 ront tous lesdicts officiers qui seront  
 pourueuz d'offices durant lesdites Neuf  
 années, receuz à iouyr de ladite Dispen-  
 se dans deux mois, à compter du iour &  
 datte de leurs quittances de finance,  
 ou resignation, En payant ledit Droit  
 annuel pour l'année courante en laquel-  
 le ils seront pourueuz, & faisant (aussi)  
 ledit prest par les officiers obligez en  
 iceluy dans ledit temps, A proportion  
 toutefois du temps qui restera à expirer  
 desdites Neuf années, dás lequel ne sera  
 comprise ladite année courante V O V-  
 L O N S (aussi) que les Resignataires, ou  
 veufues & heritiers des officiers qui au-  
 ront faict ledit prest & aduance, & cō-  
 tinué le payemēt dudit Droit annuel,  
 soyent tenus de nous payer pour droit  
 de Resignation, ou demission des offices  
 esquels ils auront droit, le quart de

nier de ladite ancienne Eualuation de leurs offices, au lieu du huiëtiefme qui fouloit estre payé, excepté les Officiers de nosdites Cours souueraines cy-dessus declarez : Lesquels pour les susdites cōsideratiōs, payerōt (seulemēt) pour le droict de Resignatiō, ou demissiō, ledit huiëtiefme denier de l'anciēne Eualuation de leurs offices, ainsi qu'ils auoient accoustumé. Et pour les resignations qui seront faictes par tous ceux de nosdits Officiers, lesquels n'auront voulu entrer en la iouyssance de ladite Dispēse aux conditions susdites, sera la finance de leursdites Resignations taxée en nostre Conseil, ainsi qu'il appartiendra par raison, ayant esgard au prix & valeur de leurs offices, gages & droicts y appartenans. Et pource qu'il nous importe, & au public, de faire choix des personnes dont les merites nous soient cogneuz, pour tenir & exercer les prin-

eipales charges de ce Royaume, comme  
 de Presidens, Aduocats & Procureurs  
 generaux en nos Cours souueraines,  
 Lieutenans generaux, Ciuils & Crimi-  
 nels, & Substituts des Procureurs ge-  
 neraux es Bailliages, ou Seneschauflées  
 esquelles il ya Presidial estably, les pour-  
 ueuz desdits offices venans à deceder  
 auant que leurs resignations ayent esté  
 admises, Nous nous reseruôs (audit cas)  
 la disposition desdits offices, pour en  
 faire pouruoir telles personnes capables  
 que verrons bon estre, A la charge tou-  
 tesfois, & non autrement, de payer par  
 ceux qui seront par nous choisis, &  
 nommez, aux veufues, ou heritiers des  
 decedez, la valeur desdits offices, au  
 prix commun & courant entre les offi-  
 ciers: Et pour receuoir les deniers dudit  
 prest, & Droiât annuel, seront mis des  
 Bureaux par lesdits Thresoriers des par-  
 ties casuelles en chacune des Generali-

tez de ce Royaume ou ailleurs, selon  
qu'il leur sera par nous ordonné, & les-  
dits deniers portez esdits Bureaux, ain-  
si & comme il se faisoit auparauant la-  
dite reuocation. Permettans à ceux de  
nosdits Officiers qui voudront acq-  
querir ladite Dispense sans payer en per-  
sonne, passer procuration pour faire le-  
dit payement pardeuant Notaires ou  
Tabellions Royaux, en presence du  
Iuge & Substitut de nostre Procureur  
General du siege de la Iurisdiction or-  
dinaire & Royale, dont ressortiront les-  
dits Notaires, ou pour leur absence, de  
deux Conseillers dudit siege: Et à cau-  
se de la briefueté du temps, laquelle ne  
peut permettre à vn desdits Thresoriers  
de vacquer seul à la recepte des deniers  
qui se doiuent payer en la presente an-  
née, tant pour ledit Droit annuel, que  
pour ledit prest, les trois Thresoriers de  
nosdites parties Casuelles feront vn  
depar-



departement entr'eux des Generalitez,  
ou Prouinces, pour lesquelles ils expedieront chacun leurs quittances. Si  
DONNONS en mandement à nostre  
tres-cher & feal le Sieur du Vair, Gar-  
de des Sceaux de France, que ces presen-  
tes il face lire & publier en nostre grã-  
de Chancellerie, le seau tenant, & du  
contenu en icelles faire iouyr & vser  
plainement & paisiblement tous nos-  
dits officiers pendant lesdites neuf an-  
nées, sans souffrir & permettre qu'il y  
soit contreuenue en quelque sorte &  
maniere que ce soit : Et desirant que  
tous nos officiers soient informez de la-  
dite grace & Dispense a eux concedée;  
N o u s voulons & ordonnons que ce-  
ste nostre presente Declaration soit en-  
uoyée en tous les Bureaux des Threso-  
riers generaux de France de nostre  
Royaume, & à tous nos Baillifs, Senes-  
chaux, & autres nos Iuges Royaux &

ordinaires, pour y estre registrée, leuë, publiée l'Audiance tenant, afin que nul de nosdits officiers n'en puisse pretendre cause d'ignorance. Ce que nous leur mandons & enioignons de faire, & au premier Huissier ou sergent Royal sur ce requis, tous exploicts & significatiōs necessaires pour l'effect & contenu de ces presentes, Nonobstant oppositions ou appellations quelsconques, dont si aucunes interuiennent, nous auons retenu & reseruë la cognoissance à Nous, & à nostre Conseil, & icelle interdite & defenduë, interdisons & defendons à toutes nos Cours de Parlemens, & autres nos Iuges quelsconques: Et parce que de ces presentes l'on pourroit auoir affaire en plusieurs & diuers lieux, Nous voulons qu'au vidimus d'icelles deuëment collationné par l'un de nos amez & feaux Conseillers, Notaires & Secretaires, foy soit adioustée comme

au present original. CAR tel est nostre plaisir, Nonobstant toutes Lettres de suruiuance, & autres Lettres qui pourroient auoir esté accordées à aucuns de nos officiers, pour exercer encores leurs charges pendant quelques années, lesquelles nous auôs reuoquées & reuoquôs par ces presentes, encores qu'ils les ayent resignées, voulans que ceux qui ont obtenu lesdites Lettres, ayent dans la fin du mois de Iuin prochain à declarer s'ils entendent retenir lesdites charges, ou s'en demettre és mains de leurs resignataires : Et en ce cas les faire receuoir & installer en l'actuel exercice d'icelles, autrement à faute de ce faire dans ledit temps, & iceluy passé, lesdits offices seront declarez vacans, & impetrables par le deceds de ceux qui se trouueront dans l'exercice d'iceux, sinon qu'ils ayent payé ledicts prests & Droict annuel,



Nonobstant aussi tous Edicts, Ordonnances, & autres Lettres à ce contraires, ausquelles & aux derogatoires des derogatoires y contenuës, Nous auons desrogé & desrogeons par cesdites presentes. DONNÉ à Paris, le vingt deuxiesme iour de Feurier, l'an de grace, mil six cens vingt & vn, & de nostre regne le vnzième.

Signé, LOVIS.

Et plus bas, par le Roy.  
DE LOMENIE.

Et sellées sur double queuë du grand seau de cire iaune.

Et plus bas est encores escrit.

*Leuës & publiées le seau tenant, & registrées es Registres de l'Audiance de*



*France, par moy Conseiller, Secretaire du Roy & de ses Finances, & grād Audiancier de France. A Paris ledit iour vingt-deuxiesme Feurier, mil six cens vingt & vn.*

*Signé,*      **DESPORTES:**

Collationné aux originaux par moy  
Conseiller, & Secretaire du Roy

Finances par le Roy  
Le Roy de la France  
Le Roy de la France  
Le Roy de la France  
Le Roy de la France

DEPOSEE

Le Roy de la France  
Le Roy de la France



